

**Kalaallit Nunaanni aningaaasarsiornermut killeqarfimmi imaani avatangiisiniq
allanngutsaaliuinissaq pillugu inatsimmut Namminersorlutik Oqartussat tapersiinissaat
pillugu Inatsisartut aalajangiiffigisassaattut siunnersuut
(Saqq.: Pinnortitamut, Avatangiisinullu Naalakkersuisoq)**

pillugu

Eqqissimatitsinermut Avatangiisinullu Ataatsimiititaliap

ISUMALIUTISSISSLUTAA

Siunnersuutip aappassaaneerneqarneranut saqqummiunneqartoq

Suliarinerani Ataatsimiititaliami uku peqataapput:

Inatsisartunut ilaasortaq Kelly Berthelsen, Inuit Ataqatigiit, siulittaasoq

Inatsisartunut ilaasortaq Knud Kristiansen, Siumut, siulittaasup tullia

Inatsisartunut ilaasortaq Ineqi Kielsen, Siumut

Inatsisartunut ilaasortaq Villy Olsvig, Inuit Ataqatigiit

Inatsisartunut ilaasortaq Henrik Fleischer, Partii Naleraq

Ulloq 21. April UPA 2017-ip nalaani siullermeerneqarnerata kingorna Ataatsimiititaliap siunnersuut misissorpaa.

1. Siunnersuutip imaa aamma siunertaa

Siunnersummi pineqarpoq Kalaallit Nunaanni aningaaasarsiornermut killeqarfimmi imaani avatangiisiniq allanngutsaaliuinissaq pillugu inatsisissatut siunnersummut Inatsisartut tapersiissasut, ukiunimi kingullerni Kalaallit Nunaata eqqaani imartani ingerlatsinerit annertusiartorlutilu sulilu annertusiartuaaramik, ukiunilu tulliuttuni umiarsuit angallannerat annertusiartuaaginnarnissaa naatsorsuutigineqarmat.

Kalaallit Nunaanni aningaaasarsiornermut killeqarfik pillugu inatsiseqarnermi nunani tamalaani isumaqatigiissutit ileqqusullu isumannaerneqarlutilu naapertorneqassapput. Siunnersuutip akuerineqarnerata kingunerissavaa umiarsuup silaannakkulluunniit angallatip piginnituata, mingutsitsisimasup, mingutsitsinermik akiuiniarnermut aningaaasartuutit akilissagai Piumasaqaataasinnaavortaaq piginnittooq aningaaasartuutissanut taakkununnga qułarnaveeqquisiissasoq. Tamatuma saniatigut teknologii mingutsitsinnginnerusoq

inatsisisatut siunnersuummi piumasaqaataavoq, tamannalu teknologii pitsaanerpaamik atorneqarsinnaasoq pillugu tunngaviliussamat naapertuuppoq.

Inatsisisatut siunnersuut Naalakkersuisut Siunnersuutaannut uunga: Imaani avatangiisit allanngutsaaliorneqarnissaat pillugu Inatsisartut inatsisaat nr. xx, xx 2017-imeersumut ataqtigiissillugu isigineqassaaq. Naalakkersuisut inatsisisatut siunnersuutaanni imani akisussaaffeqarfik maleruagassiivigineqarpoq, danskit inatsisisatut siunnersuutaani aningaasarsiornermut killeqarfik maleruagassiivigineqarluni. Naalagaaffimmi oqartussaasut inatsisisatut siunnersuutaani aamma Naalakkersuisut inatsisisatut siunnersuutaani suliarineqarnerannut atatillugu, danskit oqartussaasui aamma kalaallit oqartussaasui qanimut suleqatigiippu. Oqaloqatigiinnerup kingunerisaanik inatsisisatut siunnersuutit sapinngisamik imminnut naapertuupput.

2. Siunnersuutip Inatsisartunit siullermeerneqarnera

Partiit tamarmik aalajangiiffigisassatut siunnersuummut annertunerusumik isumaqataapput, ataatsimiitaliamilu suliarinerata nanginnissaa innersuussutigalugu.

3. Siunnersuutip Inatsisartunit suliarineqarnera

Aalajangiiffigisassatut siunnersuutip aappassaaneerneqannginnerani Ataatsimiitaliaq Pinngortitamut Avatangiisinullu Naalakkersuisumit paassisutissiilluni ataatsimeeqatigiinnissamut ulloq maajip 5-ni 2017 aggersarneqarpoq. Tassani Imaani avatangiisit illorsorneqarnissaat pillugu Inatsisartut aalajangiiffigisassaattut siunnersuut aamma maanna Kalaallit Nunaanni aningaasarsiornermut killeqarfimmi imani avatangiisiniq allanngutsaaliuinissaq pillugu inatsimmut Namminersorlutik Oqartussat tapersiinissaat pillugu aalajangiiffigisassatut siunnersuut Pinngortitamut Avatangiisinullu Naalakkersuisup saqqummiuppi. Siunnersuutinut marluiusunut Naalakkersuisut inassutaat akuersaarnartinneqaaq, tassanimi Naalakkersuisumit taaneqarami Inatsisartut inatsisisaattut siunnersuut ukiut arfineq pingasut missaani ingerlanneqarsimasoq. Imaani avatangiisit allanngutsaaliorneqarnissaat pillugu inatsisip Kalaallit Nunaanni Namminersorlutik Oqartussat ilaliinerisigut siunertaavoq sillimaniarneq pillugu maanna nunat tamalaat piumasaqaataannut naleqqussaanissaq minnerunngitsumillu imartami silaannarmilu mingutsitsinermut piumasaqaatit naleqqussarnissaat. Inatsisisap siunertaraa 200 somilip iluani mingutitsisut namminneerlutik mingutsitartik akilertalissammassuk. Inatsisisatup siunnersuutip ilutigitillugu siunertaraa Kalaallit Nunaata inuussutissarsiutit pingarnersaat illorsorneqartariqarnerat imamammami 200 somilinimmi killeqarfiup iluani aalisakkanik pisarineqartartunit isertitat Kalaallit Nunaanni aningaasaqarnerup inissisimaneranut tunngaviulluinnartuummata.

Ataatsimiitaliami siunnersuut pillugu eqqartuereerneremi siuliani pineqartut tunngavigalugit aalajangiiffigisassatut siunnersuut isumaqataffigalugu aalajangiuppaat.

4. Siunnersuutip aningaasatigut kingunissai

Inatsisartut suleriaasianni § 33, imm. 1-imi allassimavoq, aalajangiiffiqisassatut siunnersuutip piviusunngortinnissaanut siunnersuut tunngavilersugaassasoq siunnersuutillu aningaasatigut allaffissornikkullu kingunissai allaaserineqarsimassasut.

Ataatsimiititaliap maluginiarpaa, taakku naapertorlugit siunnersuutip piviusunngortinnerani siunnersuutip aningaasatigut kingunissai taaneqarsimasut, taamaalillunilu tamanna kinguneqarnavianngitsoq. Taamaattorli piviusunngortitsinermi uuliamik imaarsisarneq pillugu nalunaarut, eqqakkanik imaarsisarneq pillugu nalunaarut, nalunaarutiginnittarnerit pillugit nalunaarut aamma akuutissanik imerpalaunik poortuusersugaatinngit assartorneqartunik immikkoortiterisarneq, suussusersiisarneq, assartuussisarneq kiisalu imarsisarneq pillugit nalunaarut. Nalunaarutit atuutilerneranni pingaartumik inuussutissarsiortunut aningaasaqarnikkut allaffissornikkullu annikinnerusunik sunniuteqassasoq naatsorsuutigineqarpoq, tassami pingaartumik nunani tamalaani inatsisinut Kalaallit Nunaannut atuuttunut naapertuuttumik maleruagassat atuutereersut nutarterneqartussaammata.

Taakku ataatsimiititaliamit tusaatissatut tiguneqarput.

5. Ataatsimiititaliap inassutaa

**Taamaalilluni ataatsimiititaliap isumaqatigiittup inassutigaa siunnersuut
akuerineqassasoq.**

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.

Kelly Berthelsen,
Siulittaasoq

Knud Kristiansen

Ineqi Kielsen

Villy Olsvig

Henrik Fleischer